

Il nestri sant: il patriarcje Bertrant

Memoreâ in cheste glesie che e conserve i vues dal beât Bertrant, in cheste catedrâl di Udin, usgnot, a distance di secui, chei 6 di Jugn, cuant che lu àn copât su la plaine de Richinvelde, us dîs la veretât che o ai plasê di fâlu. Parcè che al è dificil cjatâ te storie di un popul un om, vignût di lontan (in Friûl al è rivât dai Paîs Bas) che al à volût plui ben a cheste tiere sedi gleseastichementri che civilmentri, che no chei che a crodevin di jessi i fîs di cheste tiere parcè che a jerin nassûts chenti.

Al è di dî po dopo che al è propit un confuart fevelâ culî di chest grant om che, jo no sai par ce resons, no vin valorizât tant.

Se chest om lu vessin vût altris popui, lu varessin fat diventâ une vore grant, parcè che al è un esempli di coragjo, di nissune pôre, tant di savê precîs in chê sere, prime di partî di Sacîl par vignî a Udin, che lu spietavin pe strade par fâlu fûr.

Nol è che nol ves savût che le vevin cuintri di lui, e pûr cence nissune pôre al è lât indenant.

E cence nissune pôre al à dit di no a chei che a mertavin dit di no.

Cjalait, nancje a fâle a pueste, al semee che jo o vadi a cirîlis. Al è ce che o podês cjatâ inte storie dal Paschini, dal Leicht e dal Menis. O podês cjatâ tranquilementri che al veve tal cjâf pe sô diocesi - che no jere dome la sô diocesi ma ancje il so principât temporâl, come che si diseve in che volte (lui al jere ancje il duce dal Friûl, no dome il patriarcje) - problemis che, nancje a fâ a pueste, o fevelin di lôr ancje cumò.

Al veve tal cjâf di protezi il cumierç e la sigurece des stradis: savêso di cualis? Chê dal pas di Mont di Crôs, chê di Pontebe e Tarvis, chê dal pas dal Predil, Cjaurêt, jù fin a Cividât par Stupize. Al semee une vore strani, ma propit tal 1344 a son scomençâts i prins cors de universitât a Cividât. Nancje a fâlu a pueste!

E vâl la pene ricuardâlu. Al è un om che al vedeve tant lontan.

Si cjate par esempli une altre robe curiose: a un ciert pont al à mandât fûr un decret, lui patriarcje e duce, dulà che al proibive ai siôrs di puartâ plui di un ciert numar di botons di aur, aes feminis ur proibive di puartâ zoiei o robis di aur sore di une misure. Parcè?

Il '300 in Friûl al è un secul plen di ricjecis.

No si stave mâl. E pûr, propit parcè che si cjatavin intune situazion dal gjenar, i premeve che chei che a disponevin di une vore, no mostrassin e, soledut no tirassin a ciment chei che no vevin tant.

Robis che ditis in zornade di vuê a laressin propit ben! Il no tirâ a ciment e je une robe che nus fâs ben ancje in dî di vuê.

Al è propit di augurâsi che no nus mançji, ancje in dî di vuê, int di cheste fate. O vin bisugne, come simpri te vite, cuintri dal diaul, clamînu cussì o se o volês cuintri de nestre tristerie che o vin intorsi, e dopo ancje di front ai oms che cualchi volte a àn simpri la tentazion di fâ i prepotents, o vin bisugne di tignî chest esempli di coragjo, di jessi bogns di dî di no, no dome dî di sì, dutis lis voltis che al covente.

E je une virtût ancje chê: la virtût dal coragjo, che al è un pôcs di secui che le viodin metude di bande.

Ma usgnot in cheste glesie e va ben dite une altre robe. Une des resons che al è stât copât e che al à vût cuintri di lui ancje i cjalunis di Cividât che a jerin te leghe e tal complot, al è che al à talmentri amât Udin che al jere clâr che al voleve traspuartâ a Udin la sede dal patriarcjât.

Al è vêt: o podin dî che Udin al scomence a diventâ une citât sot Bertolt di Andechs, ai timps di Fidri secont di Svevie, un secul o doi prime. Ma cul beât Bertrant al passe de categorie di païs ae categorie di citât. Cussì, al è in cualchi maniere il fondadôr de citât di Udin. E e vâl la pene sotliniâlu in cheste glesie.

Jo no ai nissune risierve viers i sants che no son de nestre tiere; par esempi di san Francesc o pues fevelâ dome ben di lui. Ma o dîs che al è tant naturâl che ogni glesie, ogni comunitât locâl, ogni Glesie locâl, e rimarchi i siei sants.

Parcè? Par un motif une vore sempliç. La fede e je la fede, ma il mût di sintîle, di vivile, di esprimile lu vin ognidun il nestri.

Si le paie se si vûl imponi un mût di sintî la religjon, di esprimile, di vivile masse compagn. O vin di cjatâsi dacuardi te fede, ma dîle ognidun a mût so.

Al pues jessi ancje une vore strani, par esempi, che o memorein un patriarcje e un duce che al è stât bon di doprâ la spade, bon di tirâle fûr a cuasi novante agns, esatementri su la plane de Richinvelde, dulà che lu àn copât. No si è lassât copâ cussì, cence tentâ di difindisi. Cualchidun di altre tradizion religjose al cjate strani chest. Tal ambient furlan dal 1300, dulà che l'amôr pe Glesie e l'amôr pe proprie tiere a jerin la stesse robe, al è naturâl.

La ultime preiere di cheste Messe dal beât Bertrant e dîs: "che la nestre fede no pierdi mai il savôr de nestre tiere".

* * *

Chescj i pinsîrs che mi à fats vignî tal cjâf il beât Bertrant, usgnot. Ma propit come usgnot, viodêt ce fatalitât, ai 6 di Jugn no dal 1350 ma dal 1420, a son rivâts i soldâts di Vignesie a Udin e al è finît il patriarcjât temporâl, e je finide ancje la nestre indipendence.

La storie dai popui e à moments triscj e moments legris, e mi permetarês che di chest pulpit mi auguri che dopo tancj secui Diu si ricuardi di nô e nus dei cualchi moment legri; parcè che inte storie o vin di tornâ une vore indaûr par cjatâ moments legris.

Udin, 06-06-72 (Domo)